



In podest prominent tar la Notg da sport grischuna: Laurien van der Graaf, Nevin Galmarini e Lara Heini.

FOTOS G. N. STGIER

# In meritaivel victur

Cuira: Notg da sport grischuna

DA GION NUTEGN STGIER / ANR

■ Il snowboardist Nevin Galmarini succeda al lutgader Armon Orlik sco sportist grischun da l'onn. Parti en quella tscherna è el sco grond favurit ed a la fin er merità quel titel. Tar onur èn er vegnidas la passlungghista Laurien van der Graaf e l'unhockeyana Lara Heini. Il titel sportist grischun è vegnì surdà l'emprima giada il 1992 e quai a la pattinunza Barbara Hunger. Dapi 19 onns undrescha dentant l'Associaziun grischuna per sport sportists e sportistas ed a medem temp vegn er elegì il sportist ubain la sportista da l'onn. La Notg da sport grischuna, quella è vegnida introducida avant sis onns. Venderdi ha gi lieu en l'Auditorium da la Banca chantunala la 7avla ediziun da la Notg da sport grischuna e danovamain è ella daventada in event da gala. Da la partida blera prominenzia da sport, da la politica e da l'economia.

## Gratulaziuns da cusseglier guvernativ Martin Jäger

Sa drizzà a la raspada è er Remo Cavegn, il president da l'Associaziun grischuna per sport. La Notg da sport saja er adina la vitrina dal sport grischun, ha el ditg. A pled è er vegnì cusseglier guvernativ Martin Jäger. El ha ditg che tar il sport quin-

tan bain ils temps, las lunghezzas, puncts e tutgadas, ma sport saja er passiuun e prestaziun. El ha cusseglià a tuts sportistas e sportists da na esser meglier, ma bain d'esser meglier che quai che mintgin saja stà ier.

## Jau ma chat ventiraivel

In onn perfetg ha bain gi Nevin Galmarini, snowboardist grischun. El dastga guardar enavos sin ina stagiun d'enviern 2017/2018 sensaziunala. A Pyeongchang è l'Engiadinais vegnì campiuun olimpic en il slalom gigant parallel. Pli-navant ha Galmarini er anc gudagnà la Cuppa mundiala generala. Il titel da sportist grischun da l'onn haja el pli che



Isabella Wieland ha manà tras la saira.

merità, è vegnì ditg adina danovamain durant sia undrientscha. El saja pli che be ventiraivel, ha el ditg tut content.

## Ina passlungghista ed ina unihockeyana

Segunda en quella tscherna è vegnida la passlungghista Laurien van der Graaf. L'enviern passà ha ella gudagnà duas curas da la Cuppa mundiala ed ina da quella a Lai. Sco Galmarini è er ella sa musada contenta da vegnir undrada. Cumpletta il podest ha la unihockeyana Lara Heini da Piranha Cuira. Ella mida sin la proxima stagiun dal club grischun tar in club en Svezia.

## Onur per ils tiradors

In freeskier ch'è sin la meglra via da daventar in um per victorias è Rafael Kreienbühl. El ha retschet il premi sco «newcomer» da l'onn ed è sa mussà fitg surstà da quella onur. Il funzionari/trenader da l'onn 2018 sa numna Carl Frischknecht, el che viva per il tir. El ha ditg che quella undrientscha saja cunzunt er in'onur per l'entir sport da tir. Da present è l'um da Tumeagl president da l'Uniu da tir grischuna. Sco meglra uniu da l'onn è vegnì undra il Club da football Broncos. Il passlungghista Luca Tavaschi ha retschet il premi sco sportist da l'onn cun impediments.



Ils dus skicrossers Alex Fiva (a san.) ed Armin Niederer.



Irene Cadurisch, la biatleta, cun ses geniturs Vreni e Flurin Cadurisch.



L'anteriu lutgader Stefan Fausch.



Cusseglier guvernativ Martin Jäger cun Laurien van der Graaf.



Il president da l'Associaziun grischuna per sport cun trais dals numerus giasts da la Notg da sport: Leo Jeker, Claudia Bundi, Remo Cavegn e Hannes Parpan (da san.).



Da la partida a la saira da gala èn er stads ils dus deputads Reto Cramer (a san.) e Sepp Franz Caluori.